

लहना

व्यावसायिक पत्रकारिता, थौंया आवश्यकता

LAHANA WEEKLY

वा:पौ

सा:गु भिंगु मरिचरिया निति
लुमंका दिसँ ।



लक्ष्मण गजाल 'चिलमि'
प्रोप्राइटर
लाखा छँ
LAKHA CHHEN

सोह्रखुटे, वडा नं. १६, चौ, फोन नं.: ८३६०७५८

थुकि दुने

त्वा: त्वालय प्रहरी व स्थानीय सरोकार
सुनील महर्जन - २

व्यक्ति व्यक्तित्व
प्रेम सुवालाया
शिक्षाप्रतिपा
दृष्टिकोण ? - ३



मेमेगु स्वयां फरक ढंग यायगु सोच ख:
रूपेन श्रेष्ठ "थक्का:मि", कलाकार - ६



नूदँ समारोह समिति यलया म्बसालय
ने.सं. ११३८या भित्तुना सांस्कृतिक याली
(पेज ४-५)

निर्वाचन लिख्यायत प्रधानमन्त्री देउवायात दबाव

सर्वोच्चया आदेशं निर्वाचन आयोग नं अन्यौलय

लहना संवाददाता

वइगु मंसिर १० व २१ गते जूवनाच्चंगु प्रदेशसभा व प्रतिनिधिसभाया निर्वाचनयात लिख्यायगु निति नेपाली कांग्रेसया सांसदतयसं पार्टीया सभापति नाप प्रधानमन्त्री शेरबहादुर देउवायात व्यापक रुप दबाव बीगु सुरु यानाह:गु दु । स्थानीय तहया निर्वाचनया परिणामयात कया: स्वल धा:सा नेकपा एमाले व नेकपा माओवादी केन्द्र छपू जूगु अवस्थाय् नेपाली कांग्रेस, राष्ट्रिय प्रजातन्त्र पार्टी व संघीय समाजवादी फोरम छपू जूसां नं १०गु प्रतिशत स्वयां अप्च: थासय् बामगठन्धन त्याइगु विश्लेषण यासें कांग्रेसया सांसदतयसं हे चुनाव लिख्यायत दबाव बीगु सुरु यानाह:गु सूत्र धा:गु दु ।

लिपांगु इलय् शीथी संचार माध्यमय् न्हापांगु चरणया निर्वाचनय् कांग्रेस नेतृत्वया लोकतान्त्रिक गठबन्धनपाखें गोरखाया २ नम्बर क्षेत्र, मुस्ताङ, मनाङ व रसुवा याना: प्यंगू निर्वाचन क्षेत्रय् जक त्याइगु अले मेगु फुक्क हे निर्वाचन क्षेत्रय् वामगठबन्धन त्याइ धका: विश्लेषण याना: समाचार पिहां वय्वं कांग्रेसया सांसदतयसं उक्तथं दबाव

चुनाव लिख्यायफत धा:सा एमाले व माओवादी केन्द्रयात कि त पार्टी एकता याय्माली मखुसा इमि दथुइ विभाजन जुइगु अवस्था वइ, अले राजनीतिक कोर्ष हे न्हूकथं विकास जुइगु जुया: चुनाव लिख्याय्मा: धका: तर्क कांग्रेसया नेतातयसं दबाव बियात्तवंगु ख: ।

बीगु सुरु यानाह:गु ख: । स्थानीय तहया निर्वाचनया मत परिणामयात स्वल धा:सा धात्थें बामगठबन्धन हे त्याइगु अले ईपिं छपू जुयावनीगु अवस्थाय् अभ् अप्च: मत काइगु संभावना दुगुलिं आ: थ्व अवस्थाय् चुनाव यात धा:सा दुई तिहाई बहुमत वामपन्थीतयसं हइगु ताय्का: उक्तथं निर्वाचन लिख्यायत प्रधानमन्त्रीयात दबाव बीगु यानाह:गु ख: ।

सूत्र धा:कथं निर्वाचन आयोग नं चुनावया सवालय् अन्यौलताय् लानाच्चंगु दुगुलिं प्रधानमन्त्री देउवा धा:सा चुनाव

लिख्यायगु वा लिमख्यायगु धइगु खँयात कया: निर्णय याय्गुकथं सुलिसे नं सहलह ब्याकादीगु धा:सा मदुनि । पार्टीया सभापति नं थ: अले प्रधानमन्त्री नं थ: हे जुयाच्चनागु इलय् चुनाव याना: कांग्रेस १० प्रतिशत हे त्याके मफइगु अवस्था बल धा:सा शेरबहादुर देउवाया राजनीति हे धरापय् लाइगु अवस्था जुया: वय्क:या लिक्क ला:पिं कांग्रेसया नेतातयसं नं उगु हे कथं चुनाव लिख्यायगु निति सुभाब बियादीगु खँ सीदुगु दु । यदि चुनाव लिख्यायफत धा:सा एमाले व माओवादी केन्द्रयात कि त पार्टी एकता याय्माली मखुसा इमि दथुइ विभाजन जुइगु अवस्था वइ, अले राजनीतिक कोर्ष हे न्हूकथं विकास जुइगु जुया: चुनाव लिख्याय् मा: धका: तर्क कांग्रेसया नेतातयसं दबाव बियाच्चंगु ख: ।

उखे निर्वाचन आयोग नं चुनावया सवालय् अन्यौलताय् लानाच्चंगु दु । प्रदेशसभा व प्रतिनिधिसभाया निर्वाचनया मतपत्र ब्यागलं ब्यागलं याय्त तयार जूगु जूसां नं मतदानया सवालय् धा:सा समस्या वइगु जुया: पुनरावलोकन याय्मा: धका: तर्क धयाह:गु दु ।

आ: वइगु चूनावय्
नेपा: राष्ट्रिय
पार्टीया उम्मेदवारी



यँ । नेपा: राष्ट्रिय पार्टी केन्द्रया प्रतिनिधिसभाय् प्रत्यक्षनाप प्रदेशसभाय् उम्मेदवारया नां क्व:ज्युगु दु । पार्टीया नाय: डा. विजयप्रकाश सैजुं ब्यूगु जानकारीकथं प्रदेशया ३ नं. छगू प्रदेशय् जक थ:गु उम्मेदवारी बिया: पार्टीयात प्रदेश केन्द्रीत पार्टीकथं सशक्त याना यंकेगु धयादीगु दु । तर पार्टी केन्द्रया प्रतिनिधिसभाय् नं प्रत्यक्षनाप समानुपातिक उम्मेदवारी क्व:ज्युगु खँ वय्कलं कनादीगु ख: ।

नेपा: राष्ट्रिय पार्टीपाखें प्रतिनिधिसभा व प्रदेशसभाय् जनजाति, मधेस, दलित, खस आर्य, थारु, शारीरिककथं अशक्त जूर्पिलसैं मुक्कं ३१म्ह उम्मेदवारी समानुपातिकय् विधिपूर्वक निर्वाचन आयोगय् दर्ता याना: आयोगपाखें स्वीकृत कायधुंक्नुगु दु ।

त्यं ७ पेजय्

डा. केशवमान शाक्य राजनीतिपाखें सन्यास काइगु

यँ । नेवा:तय्गु पार्टी धका: नेपा: राष्ट्रिय पार्टी नीस्वना: व हे पार्टीया नेताया ल्याखं मन्त्रीतक जुयादीम्ह नेवा: न्हयलुवा: डा. केशवमान शाक्य आ: राजनीतिपाखें सन्यास काइगु जूगु दु । संविधानसभापाखें संविधान जारी जुइ न्हय: डा. शाक्य डा. बाबुराम भट्टराईया नेतृत्वया सरकारय् वना: मन्त्रीतक जुयादीगु ख:सा लिपा देशय् संविधान वय्धुंका: डा. शाक्य नेपा: पार्टीया हे आपालं नेतातय् नाप ब्वना: डा. बाबुराम भट्टराई नं नीस्वनादीगु 'नयाँ शक्ति नेपाल'य् वनादीगु ख: । नयाँ शक्ति नेपाल स्थानीय तहया चुनाव सामना याय्मा:गु अले उगु चुनावया लिच्च:या ल्याखं कमजोर ताय् का: यक्व हे नेता कार्यकर्ता मेमेगु पार्टीइ वनेगु यानाच्चंगु ख: । लिपा हाकनं मधेसी जनअधिकार फोरम नेपाललिसे एकताया निति कुत: या:गु ख:सां अन्तत: लिपा वना: एमाले व माओवादी केन्द्रलिसे पार्टी हे एकता याय्गु घोषणा या:गु ख: । हाकनं कांग्रेसलिसे चुनावी तालमेल याय्गु इवलय् नयाँ शक्ति नेपाल वंगु अवस्थाय् उगु हे पार्टीया नेता डा. शाक्य राजनीतिपाखें सन्यास काय्गु घोषणा यानादीगु ख: ।

वंगु विहिवा: इन्डिजिनस टेलिभिजनया जनसवाल नांया खस भाय्का ज्याइवलय्



अन्तर्वार्ता बियादिसैं वय्कलं आ: प्रदेशसभा व प्रतिनिधिसभाया चुनाव लिपा थ: राजनीति त्व:ता: सामाजिक अभियानय् वनेगु खँ धयादिल । न्हापा नं थ: छम्ह सामाजिक अभियन्ता जूगु धयादिसैं चुनावतक डा. बाबुराम भट्टराईयात साथ बीगु व उगु पार्टीयात त्याकेगु निति भूमिका म्हितेगु धयादिसैं व लिपा थ: राजनीतिपाखें ब्यागलं च्वना: सामाजिक अभियन्ताकथं न्ह्या: वनेगु धयादिल । आ: थत्थें हे नयाँ शक्ति नेपाल त:धंगु राजनीतिक पार्टी जुया: देय् या निति निर्णायक थासय् च्वना: भूमिका म्हितेफइगु अवस्था मदु धका: तर्क स्पष्ट यानादिल । देशय् संविधान जारी जुइ धुका: न्हूकथं ह्यूपा: व:गु स्वीकार यानादिसैं आ: चिचीधंगु पार्टीया अस्तित्व दइमखु धका: तर्क वय्कलं दावी यानादिल ।



सम्पादकीय



ठेकेदारया बदमासी

सतक विस्तार याय्गु धइगु गांगामय् विकास थ्यंकेगु खः । अर्थात सतक विस्तारपाखें हे नागरिकतय्गु न्हियान्हिथंया आवश्यकतायात सहजकथं आपूर्ति याय्फइगु खः । उकिं विकासय् सतकया गुलि महत्वपूर्ण भूमिका दइ धइगु खँय निगू मत दइमखु ।

थ्वहे इवलय् नेपालय् गुलि नं सतक विस्तारया ज्या जुइगु खः, उकियात कया: सरकार वा सम्बन्धित निकायं खास हे ध्यान तय्गु यानाच्चंगु मदु । अभ्र धाय्गु खःसा सतकयात कया: पटक्क हे च्यूता: तयाच्चंगु मदु धा:सां पाइमखु । विशेषयाना: सतक विस्तार, अथेहे पुनःनिर्माणया ज्या गुलि याकनं याय्मा:गु खः, उकिया दय्कीगु ज्याया गति स्वय्गु खःसा थ्व ज्या जुयाच्चंगु दु वा मदु धका: नं सीके थाकुयाच्चनी । उलि जक मखु, थुगु ज्या पूवनेधुंका: छुं दिं लिपा हे व पुलांगु अवस्थाय् लिहां वइगु हुनिं थुकिया गुणस्तर गुलि दु धका: नं बारम्बार न्ह्यस: चिं ब्वलनेगु या: । तर थुकियात कया: सम्बन्धित निकायं खास हे च्यूता: तयाच्चंगु मदु । मानौं सतक दय्केज्या क्वचाय् धुंका: थुकिया गुणस्तर मापन याय्गु ज्या, टिकाउपनयात कया: सुंयागु जिम्मेवारी नं क्वचाल, व लच्छि हे जक छाये मनुइमा ।

थजा:गु हे ज्या स्वनिगलं पिने स्वाइगु गुगु हरेक दृष्टिकोणं महत्वपूर्ण जुयाच्चंगु सतकय् हे जूसां नं उकियात कया: कारवाही याय्गु निकाय मदुगु खःला धइगु आभास ब्वलनीगु खः । देशया राजधानी येँयात हेटौंङालिसे स्वाइगु कुलेखानी, फाखेल, हुमाने भञ्ज्याङ्ग सतकया हालत नं थुकथं हे जुयाच्चंगु दु । अनया सतकय् कालोपत्रे या:गु प्यला हे मडुनिबलय् जीर्ण जुइधुंक्कू बुखें थजा:गु हे खँयात उलाब्यूगु दु । थुगु सतक जिविस मकवानपुरया राष्ट्रिय यातायात सुदृढीकरण ज्याइव: मार्फत स्तरोन्नति याय्गु ज्या जूगु खःसा थुकिया जिम्मा कुमार एण्ड सन्स् कन्स्ट्रक्सनं का:गु खः ।

विश्व बैकया फिर्स्वंगू करोड स्वीच्यागू लखतका खर्च याना: स्तरोन्नति या:गु थुगु सतक प्यला लिपा हे जीर्ण अवस्थाय् थ्यंगुया हुनिं छु खः ? उकियात कया: सम्बन्धित निकाययात स्पष्टीकरण काय्मा:गु खःला कि मखु ? न्ह्यस: चिं ब्वलकाब्यूगु दु । स्तरोन्नतिया लिच्च: हे शून्य जूगु थजा:गु ज्यां जनतायात ऋण जक क्वबीकेगु ज्या मखु धका: धाय्फइमखु ।

विशेषयाना: सर्लाही, बारा, बीरगञ्ज, हेटौंङा वय् वनीगु टाटा सुमोलिसें निजी गाडीत थ्वहे लैपु जुया: वनीगु खः । तर आ:या अवस्था स्वय्गु खःसा धू ब्वया: हैरान जुयाच्चंगु दु, मानौं अन सतकया स्तरोन्नति हे जूगु खः वा मखु । थुकिंयाना: धूपाखें यात्रुत पीडित ला जुइगु हे जुल, यात्रा तर्क जोखिमपूर्ण जुयाच्चंगु दु ।

थ्वस्वयां न्ह्य: २०५७ व २०६८ सालय् नं थुगु लैपुया स्तरोन्नति याय्धुंक्कू दु । तर स्थानीयबासीं धा:सा थुकिया आभास तर्क काय् फयाच्चंगु मदु ।

खय्तला सतक दय्केगु, स्तरोन्नति याय्गु ज्या स्वय्गु खःसा थजा:गु नियति नेपा:या नितिं सामान्य हे जुइधुंक्कू दु । देशया राजधानी येँय् दुने नं थजा:गु ज्याया ढीलासुस्ती व गुणस्तरहीन ज्या यक्व हे जुयाच्चंगु दु, गुकिया मार स्थानीयबासीतय्सं फय्मालाच्चंगु दु । तर थुकिया जिम्मा का:गु संस्था धा:सा न्ह्याबलें मालामाल हे जुयाच्चंगु दु । थुकियात कया: सुनां कारवाही याइगु खः ? न्ह्याबलें न्ह्य:ने वयाच्चनीगु न्ह्यस: खः ।

त्वा: त्वालय् प्रहरी व स्थानीय सरोकार



सुनील महर्जन

नेपा:या थौंकन्हय्या राजनीतिक व्यवस्था औपचारिककथं संघीय, लोकतान्त्रिक व गणतन्त्रात्क जूगु दु । संविधानं जनतायात राज्यशक्तिया श्रोतकथं नालाका:गु दु । नेपा:या सम्प्रभु नेपा:मितय्के निहित जुइ धका: संविधानय् न्ह्यथनात:गु दु । शक्तिया दृष्टिं समाजय् निगूकथंया मनू, वर्ग वा समुदाय दु । छगू शक्ति दुपिं व मेगु शक्ति मदुपिं अर्थात शक्तिहीनता । छु वर्ग वा समुदाय, जातजाति वा भाषाभाषइयात शक्तिशाली दय्केगु धइगु खँय राज्यया चरित्रय् निर्भर जुइ । नेपाली समाजया शक्ति संरचनाया ल्याखं राजनीतिक हिसाबं हालिमुहालि याना वयाच्चंगु जाति व वर्ग बाहेक गुरुपुरोहित, आर्थिक सत्ता, कर्मचारी संयन्त्र, प्रहरी प्रशासनयात नं शक्तिकथं काय्गु या: । राज्यया प्रतिनिधिकथं दकलय् न्ह्य:ने च्वना: ज्या याइगु प्रहरी प्रशासनय् नं राज्यय् बर्चस्व दुगु वर्ग व समुदायया प्रभुत्व दयाच्चंगु दु । ता:ईतक न्ह्यानाच्चंगु पञ्चायती व्यवस्था सेना, प्रहरी व प्रशासनया लिधंसाय् न्ह्या:गुलिं नं थुकियात छगू जक शक्तिशाली कथं काइगु पुच: थौया लोकतान्त्रिक व्यवस्थाय् नं मदुगु मखु । राज्य व्यवस्था, शासनसत्ताय् पहुँच दुगु, मदुगु व तहात संरचना व उकिया क्वय्चंगु बर्ग व समुदायं थजा:गु दृष्टिकोण दय्कीगु नकारात्मककथं काय्गु पाय्छि जुइमखु । थौया प्रहरी प्रशासन लोकतान्त्रिक शासन व्यवस्थया मूर्मकथं थ्व निगुलिं धारणायात चीका: वनेगु सकारात्मक संकेत खनेदुगु दु ।

थ्वहे इवलय् गृह मन्त्रालयं नर्कनिति जक शान्ति सुरक्षा व सुशासन जनमैत्री प्रहरी व प्रशासनया अवधारणा अन्तरगत त्वा:त्वालय् प्रहरी धइगु ज्याइव: न्ह्य:ने ह:गु दु । त्वा:त्वालय् स्थानीय जनतालिसे पाचिना: उमिगु हे सहकार्यस शान्ति सुरक्षालिसे स्वानाच्चंगु समस्या ज्यंकेगु अभियान न्ह्याकागु प्रहरी न्ह्यथंगु दु । प्रहरी प्रशासनयात जनउत्तरदायी दय्कगु व शान्ति सुरक्षालिसे नागरिकया सहभागिता अप्वय्केगु अभियानया आज्ञु जूगु सीदुगु दु । सुरक्षया मू लिधंसा जनतायात दय्का: नागरिक केन्द्रीत सुरक्षा प्रणालीया पलिस्था याय्गु, प्रहरी-स्थानीय निकाय दथुया स्वापूयात बांलाकेगु व शहरनापं गांगामय् हरेक त्वाल्य् ब्लकिङ्ग प्रहरीया अवधारणायात लागू याय्गु थुकिया आज्ञु जूगु धा:गु दु । त्वा:त्वाल्य् स्थानीयलिसेया पुच: नीस्वना: उमिगु हे सहभागिताय् हरेक समस्या ज्यंकीगु जूगुलिं थुकिं अपराध म्हो याय्गु ज्याय् त:धंगु भूमिका जूवनी । थ्व अभियानपाखें आम नागरिक थौथी कथंया फाइदा काय्फइ । प्रहरीया ज्या धइगु समाजया शान्ति सुरक्षा कायम याय्गु खः । थुकिया नितिं प्रहरीं अपराध पनेत व अनुसन्धानया ज्या याइ । अपराधिक घटनाय् समाजया हे मनू दथ्याइगु जूगुलिं थुकिया लिच्च: नं समाजय् हे लाइगु स्वाभाविक ख । उकिं हरेक नागरिकया सहभागिताय् समाधान मालास्वल धा:सा उकिया प्रभावकारीता खनेदइ । थुकी स्थानीयबासीया ग्वाहालि महत्वपूर्ण जुइ । गबलय् अपराध मदुगु समाज जुइ, हरेक नागरिक शान्तिपूर्णकथं च्वनेफइ । प्रहरीं शुरुइ वडाया प्रतिनिधिलिसे अनया समस्यायात कया: सहलह याइ । व लिपा

अन म्हो जुया वनाच्चंगु अपराधिक ज्याखँया दुवाला: उकियात पनेगु योजना दय्की । गथेकि अपराध म्हो याय्गु नितिं मिसा हिंसा, लागू औषध दुर्ब्यसनी, अय्ला: त्वनीगु, मिसा मीगु, तस्करीलिसेया ज्याखँया नियन्त्रणलिसें स्थानीय स्तरय् म्हसीकगु व जुइफइगु घटनायात कया: योजना दय्का: न्यूनीकरण याय्गु ज्याइव: दय् की, गुकी जनताया प्रत्यक्ष सहभागिता दइगु खः । थुकिं नागरिक, प्रहरी व प्रशासन दथुइ स्वापू दयावनी । गबलय् नागरिक व प्रहरी मंका:कथं ज्या याइ, अबलय् यक्व हे अपराधया घटना म्हो याना यंकेगु नितिं ग्वाहालि जूवनी । मेगु महत्वपूर्ण पक्ष धइगु नागरिकं अपराध मदुगु समाज दय्केगु नितिं जिगु भूमिका नं महत्वपूर्ण जुइ/दइ धइगु थुइका: प्रहरीयात ग्वाहालि याय् मा: । प्रहरी-नागरिक जाना: न्ह्या:वन धा:सा आपराधिक घटना म्हो याय्फइ । थुकिं प्रहरीयात कया: नागरिकया अपनत्व तर्क अप्वया वनी । थ्वपाखें सुरक्षित, अपराध मदुगु व शान्त समाज दय्केगु नितिं ग्वाहालि जूवनी । स्थानीय तर्गिमं हे फुक्कसिगु ग्वाहालि दत धा:सा अपराध म्हो याय्फइ । प्रहरी बर्दी पुनात:पिं नागरिक खःसा नागरिक बर्दी पुनामत:पिं प्रहरी खः ।

अपराध समाजपाखें ब्वलनीगु जूगुलिं समाजया हे ग्वाहाली उकियात स्थानीयपाखें हे न्हंका छ्वय्फइ । थुकथं फुक्क जाना वनधा:सा समाजय् जुयाच्चनीगु आपराधिक घटना म्हो याय्गु नापं गुलिखय् अवस्थाय् न्हंके हे फइ । थ्वस्वयां न्ह्य: नं प्रहरीं थौथी अभियान न्ह्याकागु खः, तर गुलिखय् अभियान छुईलिपा हे मदयावन, थुगु अभियान थुकथं मजुइमा ।

प्रहरी सर्वसाधारणतय् याइगु व्यवहारय् छ्वाखेरं कुखिनेधुंका: थ्यंमथ्यं प्यदं न्ह्य: नेपाल प्रहरीं 'न्हिलालिसेंया प्रहरी सेवा' अभियान न्ह्याकागु खः । जनतायात न्हिलालिसें नाइक्क न्ववाना: सेवा बीगु तातुनां अभियान न्ह्याकागु खः ।

प्रहरी सर्वसाधारणतय् याइगु व्यवहारय् छ्वाखेरं कुखिनेधुंका: थ्यंमथ्यं प्यदं न्ह्य: नेपाल प्रहरीं 'न्हिलालिसेंया प्रहरी सेवा' अभियान न्ह्याकागु खः । जनतायात न्हिलालिसें नाइक्क न्ववाना: सेवा बीगु तातुनां अभियान न्ह्याकागु खः । थुकिया निदं लिपा प्रहरीइ 'प्रहरी जिगु पासा' धइगु मेगु अभियान न्ह्याकल । प्रहरीया व्यवहार भिक्तेत व प्रहरीयात कया: जनताय् दयाच्चंगु नकारात्मक सोचाइ चीकेत थुगु अभियान न्ह्याकागु खः । फुक्क जनतायात प्रहरीया पासा दय्का: नागरिक व प्रहरीया स्वापू क्वात्केत स्व:गु खः । थजा:गु ज्याइव: समाजय् शक्ति दुपिं स्वयां राज्यया शक्तिपाखें बज्चित जुयाच्चंगु वर्ग व समुदायया नितिं तसकं आवश्यक दु । मानव जीवनय् राज्यलिसे तापा:गुलिं समाजय् थौथीकथंया समस्या ब्वलनाच्चंगु दु । संविधान दय्केधुंका: नं थौंकन्हय् खनेदयाच्चंगु द्वन्द्वया मू हुनिंकथं राज्यसत्ताय् थौथी क्षेत्र, वर्ग, समुदायया हिस्सेदारी हे खः । थुकिंयाना: राज्यया चरित्र जनमुखी दय्केत, ब्यक्तिगत स्वतन्त्रता, समानता व सामाजिक न्यायया नितिं नं राज्य सञ्चालनय् ध्यान बीकेत, शासन प्रशासनयात थुइकेमा:गु दु ।

थौंकन्हय् संविधान, ऐन, नियमं गुलि नं अधिकार बियात:गु व उकी दना: राज्य छुखः ? राज्यया संयन्त्र छुखः ? शासन प्रशासन गुकथं न्ह्यानाच्चंगु दु ? कर्मचारी संयन्त्रया चरित्र, प्रवृत्ति थुइका: गुलिफु उलि जनमुखी दय्केत स्थानीय तर्गिया नीति दय्केगुली सहभागी जुइगु व दय्केगु बृहत अभियानकथं थुकियात थुइकूसा बांलाइ । थुकथंया बुझाइयात ब्यापक याय्गु, सामाजिक चेतना न्यंकेत मांकथंया ग्वाहालि याइगु संस्थाकथं प्रहरी प्रशासनलिसे, स्थानीय निकायलिसे सहकार्य याय्गु थौया

इकथं प्रगतिशील पला: धका: धाय्मा: ।

समाजय् शान्ति सुरक्षा कायम याय्गु, दयाच्चंगु ऐन, नियम कानून पालना याकेगु नापं अपराध अनुसन्धान व नियन्त्रण यायेगु नेपाल प्रहरीया मू आज्ञु खः । राज्य व प्रहरी संगठनं कानूनत: प्रत्येक प्रहरीयात थुकथं हे जिम्मेवारी बियात:गु दइ । मेखे सर्वसाधारण नागरिकया जीवनय् महत्वपूर्ण भ्वं, चालचलनलिसें थौथीकथं सिफारिस नं प्रहरी संगठनं याइ । कानूनत: प्रहरीयात समाजया थुलि महत्वपूर्ण जिम्मेवारी बियात:गु व उगु जिम्मेवारी पूर्वकेत न्ह्यज्या:गु जूसां नं आम सर्वसाधारण मनुतय्सं थ:गु न्हियान्हिथंया व्यवहारय् प्रहरी धाय्वं थौथीकथंया लू न्ह्य:ने वइगु खः । प्रहरी धाय्वं आम सर्वसाधारणया दिमागय् म्याचिक्, भन्फट व म्वा:मदुकथं दु:ख बीपिं कथं काय्गु याइ । थ्वहे इवलय् प्रहरीया खँ, डाँका, गुण्डागर्दीलिसे छुं नं छुं कथंया स्वापू दयाच्चनी धइकथं थुइकेगु याइ । समाजया थुकथं थुइकाच्चतलय् प्रहरीया ज्याखँय समुदायया सहभागिता व सक्रियता दइमखु । समुदायया सहभागिता व सक्रियता मदय्क प्रहरीं थ:गु आज्ञु पूर्वकेत थाकुइ । आज्ञु पूर्वसां नं समुदायया विश्वास काय् मफइगु अवस्था ब्वलनी ।

थजा:गु अवस्था मदय्का छ्वय्गु नितिं प्रहरी व समुदायया निरन्तर खँल्हाबँल्हा, सहलह व ग्वाहालिया भावना तसकं आवश्यक जू । थुगु दृष्टिं प्रहरी जिगु पासा, प्रहरी त्वा:त्वालय् थेंजा:गु ज्याइव: आमजनताया हीतय् समाजय् ब्वलनाच्चंगु थौथी विषयया समस्या ज्यंकेगु नितिं याइगु संवादकथं काय्मा:गु व उकथंया

लकस दय्का वनेमा:गु दु । आदिवासी जनजाति समुदाय अप्व: धइथं मनुतय्के थ: व थ:गु समुदाययात राज्य निरन्तर भाषिक्, धार्मिक व जातीय विभेदय् लानाच्चंगु कथं थुइकाच्चंगु दु । शक्तिकथं कया: थ:पिन्त मदिकक क्षमता व दक्षता अप्वय्का यंकेगु दायित्वपाखें नं थुकथं थुइकाच्चपिं लिज्यानाच्चन धाय् नं पाय् छि मजू । थुगु ज्याय् प्रहरी प्रशासन व स्थानीय विकास अधिकारीपिन्सं पाय्छिकथं सम्वेदनशी जुया: ग्वाहालि याय्मा:गु थ:पिनिगु नियमित जिम्मेवारीया हिस्सा दय्केमा: । थ्वहे दथुइ राज्यया नीति कार्यान्वयन याय्गु इवलय् राज्य संवेदनशील जुया: न्ह्या:मवंगुलिं नं प्रहरी प्रशासनयात कया: जनविश्वास म्हो जूगु घटना मजुगु नं मखु । थुकथंया समस्या नं समुदाय व प्रहरीनापं च्वना: मदिकक सहलह व खँल्हाबँल्हा याना: ज्यंकेमा:गु थौया आवश्यकता खः ।

थजा:गु अवस्थाय् प्रहरी प्रशासनं थनया धार्मिक, सामाजिक परिवेश व समुदायया मनोविज्ञानयात थुइका: संवेदनशील जुइगु व प्रहरी प्रशासनया आज्ञुइ थ्यंकेगु नितिं समुदायलिसे सहकार्य, विश्वास व ग्वाहालिया भावना ब्वलकेफूसा थजा:गु ज्याइव: ता:लाइ । थुकियात ता:लाकेगु जिम्मेवारी भोगु हे ब्वललय् व:गु दु । छायेधा:सा समुदाय व प्रहरी दथुया स्वापूति अपराध म्हो याय्गु, अपराध जुइ न्ह्य: हे नियन्त्रण याय्गु, प्रहरी प्रशासनय् नागरिकया अ:पुक्क हे पहुँच दइगु, जनविश्वास त्याकेगु व अन्तत: प्रहरी संगठनयात कया: थुइकेगु जुइ । थुगु ज्याय् ता:लाइगु धइगु प्रहरी प्रशासन व समुदाय निगुलिं ता:लाइगु खः । थ्व हे आज्ञु पूर्वकेगु साधनकथं प्रहरी जिगु पासा, प्रहरी त्वा:त्वालय् ज्याइव:यात प्रभावकारी दय्केत थ:थ:गु थासं योगदान बीगु फुक्क समाजया नितिं बांला:गु ज्या जुइ ।

त्वमिपिन्त इनाप

लहना वा:पतिइ लेख, रचना, रिपोर्ट व समाचार छ्वयादीफइ । छिकपिंसं छ्वयादीगुयात थुगु वा:पतिइ थाय् बियाच्चना । पिदंगु च्वसुयात उचित पारिश्रमिक बीगु नं सुचं बियाच्चना ।

लहना वा:पौ

भोर्छे, येँ

lahana.news@gmail.com



प्रेम सुवालया शिक्षाप्रतिया दृष्टिकोण

नेपालय् राजनीतिक दलया नेतातय्सं
औपचारिक शिक्षा हासिल यानातःगु मडु धइगु
अचः मनुतय्सं थुइकाच्वंगु दु । भीमं दक्क नेतातय्
तं छाहू हे कथं स्वयगु पाय्छि जुइमखु, छायाधाःसा
नेपालय् अजाःपिं नेतात नं दु, गुपिन्सं यक्व आखः
ब्वनातःगु दु, नापनापं देय्या शैक्षिक स्तर थकायुत
महत्वपूर्ण योगदान नं बियातःगु दु । अजाःम्ह हे
छम्ह नेता खः पुलांम्ह सांसद, नेपाल मजदुर किसान
पार्टीया केन्द्रीय सचिव नापं अन्तराष्ट्रिय विभाग
प्रमुख प्रेम सुवाल ।

खवपया शारदा उच्च माध्यामिक विद्यालयपाखें
२०३७ सालय प्रवेशिका परीक्षा सिधय्का सुवाल
प्रमाणपत्र तगिमय, येंया थापाथलि क्याम्पस,
इन्स्टिच्युट अफ इन्जिनियरिङ्ग मेकानिकल
इन्जिनियरिङ्ग ब्वनादिल। वय्कः छम्ह बांलाःम्ह
ब्वनामि जुगल्लि थुग तगिमय वय्कःयात छात्रवृति

नं ब्यूगु खः । आखःयात छखे तयाः न्ह्याइपुगु खँ
 धाय्माःसा वय्कः, थुगु तह (आःया कथं कक्षा १२)
 ब्वनाच्चंगु इलय् हे वडाध्यक्षय् निर्वाचित जुयादीगु
 खः । वय्कः २०३९ सालया नगरपञ्चायतया
 चुनावय् ख्वपय् वडा ६ या अध्यक्षय् त्यानादीगु
 खः । “प्यांगु सेमेस्टर दुगु, निदँया कोर्ष जिं ब्वनागु
 जुल, तर उगु कोर्ष सिधइगु खुला न्हयः, कोर्षया
 लिपांगु सेमेस्टरय् जि वडाध्यक्षय् त्यात ।”
 सुवाल न्हिला कनादिल, “अथेजूसां जिं उगु
 इन्जिनियरिङ्ग कोर्ष पूर्वक ब्वना ।” वय्कःया सफल
 राजनीतिक यात्राया न्हापांगु पलाः थ्व हे जुल । “उगु
 कार्यकालय् हे प्यदँ वन, मेगु कार्यकालया नितिं न
 वडा अध्यक्षय् जि हे त्यात ।” वय्कलं धयादिल ।
 २०४३ सालया स्थानीय तहया चुनावय् न वय्कः
 वडाध्यक्षय् निर्वाचित जुयादीगु खः ।

कक्षा १२ धुंका: वयूक: विज्ञान संकायपाखें

नागरिकतय्गु शैक्षिक स्तर थाहां वंसा जक देयरा विकास जुइ धयादिसै देशय स्नातक तहतक शिक्षायात अनिवार्य याय्माःगु खँय सुवाल बः बियादी । शिक्षा अनिवार्य मज्गुलिं ब्वने हे माः धइगु धारणा सकसिके मदगु वयकलं धयादिल ।

व्यवस्थापन संकायय् वनादीगु खः । वय्कलं यैंथा नेपाल कमर्श क्याम्पसय् स्नातक, ब्याचलर अफ कमर्श (बि.कम.) व्वनादीगु खः । वय्कःथा बि.कम. २०४७ सालय् सिध्दःगु खः । “बि.कम.या जाँच ब्यू वनागु जितः आःतक नं लुमं । अबलय् भक्तपुर काण्ड जुगु खःसा जि नापनापं पार्टीया अप्वः धइयें पासापिं भूमिगत जुयाच्च्वनागु खः । अबलय्था सरकारं जिनापं पार्टीया ख्वीच्याम्ह नेता कार्यकर्ताताय्त मनु स्यात धकाः मखुगु मुदा तःगु जुयाः जिपिं भूमिगत जुयाच्च्वनागु खः ।” सुबाल कनादिल, “अबलय् जि बालाजुइ च्वनाच्च्वनागु खःसा, जिगु जाँचया सेन्टर यैंथा ताहाचलया महेन्द्र रत्न क्याम्पसय् लाःगु खः । अले जि विष्णुमती खुसि जुजुं ताहाचलय् जाँच ब्यू वनागु खः ।” वयाँलिइपा वय्कलं स्नातकोत्तर मास्टर्स अफ कमर्श (एमकम) यैंथा शंकर देव बहुमुखी क्याम्सं २०४९ सालय् सिध्दयेकादीगु खः ।

सुवालं धयादीगु कथं वय्कलं क्याम्पस
ब्वंगु इलय् सरकारी क्याम्पसत जक दुगु खः अले
दक्वसिन ब्वनीगु नं सरकारी क्याम्पसय् हे खः ।
अबले सरकारी क्याम्पसय् बाँलाःपिं शिक्षकपिं नं
दु अले ब्वकीगु नं बाँलाःगु वय्कलं धयादिल ।
“निजी क्याम्पसत चायेका हयेधुंका सरकारी
क्याम्पसया गुणस्तर म्हत्वो जुया वन, आःला
सरकारी क्याम्पसया नाँ जक र्व्यँदनी धाःसा जिउ,”
वय्कलं धयादिल, “आःला स्ववियु चुनावया नितिं
जक सरकारी क्याम्पस भर्ना जुइगु जुयावःगु दु ।”
सरकारी शैक्षिक संस्थाया छगू इलय् गू प्रतिस्था दुगु
खः, उकियात वैं कायम याना तयेफयेमाःगु खँय्
सुवालं बः बियादीगु खः ।

कलेज जीवनया इलय दयकूग आधारय
पलाः तयाः हे विद्यार्थीतयस् थःगु ल्यंदनीगु
जीवनय बांलाःगु दिशाय न्ह्याकेफइ धकाः सुवाल
धयादिल । "थुगु आधार बल्लात धाःसा जक थःगु
जीवन लिपातकं बांलाना वनी धइगु थुइकाः न्हूगु
पुस्ता न्ह्यज्यायमाः ।" वयकलं धयादिल ।

छु विषय कया: ब्वनागु ख: लिपातकं हे उगु विषय हे ब्वना: उकी हे विशिष्टता हासिल यायु मा:गु सुभाव वय्कलं विद्यार्थीतयूत बियादीगु दु । “छु विषय ल्यय्धुंका, उकी हे उच्च शिक्षा हासिल यायुमा: व उकिया विशेषज्ञ जुइमा: । थुकिं समाजय् थुगु विषययाम्ह विशेषज्ञ धका: परिचय दय्की ।” वय्कलं धयादिल, “दक्क विषयस सामान्य ज्ञान ला दय्के हे मा:, अथेजुसां छगू विषयस विशेषज्ञता हासिल यायुमा:, उकिं हे मूनतयूत समाजय् म्हसीकीगु ख: ।”

शिक्षा ख्यः धइगु आन्दोलन, बन्द, हड्तालपाखें मुक्त जुइमाःगु खँय सुवाल बः बियादी । थःत जसगु अनुभवया आधारय नं वय्कलं अथे धयादीगु खः । “जिं कलेजय ब्वनाबलय देशय

संक्रमणकाल व राजनीतिक अस्थिरता जुयाचक्रु खः । पञ्चायतपाखे देय बहुदलय वनाचक्रु खः । ” सुवाल धयादिल, “बहुदल वय न्हयः न न्हयाबले बन्द, हडताल, आन्दोलन जुयाः कक्षा बालाकक सञ्चालन मजुल, अले बहुदल वयधुकाः न छुँ दै देशय राजनीतिक अस्थिरता हे जुल, थुकिं देय्या शैक्षिक खयलय न यक्व लिच्चः लात । ” सुवाल धयादीकथ न्यादै तक कलेजय बालाकक पढाइ मजुल, अथेजुयाः विद्यार्थीतयत नाप देय या शैक्षिक खयलय यक्व हे लिच्चः लाःगु खः । अबलय सरकारय तःधंगु पदय दुपि मन्तयस थः मस्तयत भारतय आखः ब्वंकेछ्वःगु अले थन हे आखः ब्वंपि आम जनताया मस्ततयस धाःसा देय या अस्थिर राजनीतिया कारण गुप्तस्त्रीय शिक्षा हासिल याय मफूग वयक्ल कनादिल । शिक्षा खयः बन्द, हडताल मुक्त क्षेत्र यायमाः, मखुसा उगु पुस्तां देय्यात भविष्य छुँ न योगदान बी मफइग वयकःया धापू द ।

सुवाल २०५४ सालया स्थानीय निर्वाचनयु ख्वप नगरपालिकाया प्रमुख्य त्यानादीगु खः । वय्कःया कार्यकालयु हे ख्वप नगरपालिकापाखें ख्वप उच्च माध्यामिक विद्यालय पलिस्था याःगु खः । वयां लिपा नगरपालिकापाखें ख्वप कलेज, ख्वप इन्जिनियरिङ्ग कलेज, ख्वप कलेज अफ इन्जिनियरिङ्ग, ख्वप पोलिटेक्निक इन्स्टिच्यूट नं चाय्कूगु खः । म्हे धेवाय् गुणस्तरीय शिक्षा ब्यूसें, ख्वपयु च्वपिं मनूतयगु शैक्षिक स्तर थकायगु नितिं थुगु शैक्षिक संस्थापाखें च्वछाय्बहःगु योगदान जुल । शिक्षित समाज दय्केत, ख्वपयु छ्वापतिकं स्नातक ब्वनेसिधःम्ह छम्ह मनू दय्केगु ख्वप नगरपालिका अवधारणा पूर्वकेत थुगु शैक्षिक संस्थात महत्वपूर्ण साबित जुल । मेयर जुयादीगु उगु इलनिसें हे सुवाल, थुपिं दक्व शैक्षिक संस्थाया व्यवस्थापन कमिटीया नायः जुयाः ज्या यानादीगु खः । २०७४ सालयु स्थानीय तर्गिया चुनाव जुइधुंकाः थुगु जिम्मेवारी नगरपालिकाया न्हूम्ह मेयरयात वंग खः ।

नागरिकतयगु शैक्षिक स्तर थाहां वंसा जक देय्या विकास जुइ धयादिसें देशयू स्नातक तहतक शिक्षायात अनिवार्य याय्मा:गु खँय सुवाल ब: बियादी। शिक्षा अनिवार्य मजगुलिं ब्वने हे मा: धइगु धारणा सकसिके मदुगु वय्कलं धयादिल। अले आर्थिककथं ल्यूने ला:पिन्सं थ:गु आख:यात स्वयां नं ज्याय् हे ध्यान बीगु अले आख: ब्वनेगु त्वतीगु वय्क:या थापू दु। शिक्षा अनिवार्य मजगुलिं हे अप्वसिनं उच्च शिक्षा हासिल मयासं दथुइ हे ब्वनेगु त्वतीगु वय्कलं धयादिल। शिक्षायात अनिवार्य याय्मा:गु अले उकिया नितिं राज्य स्नातक तहतक जनतायात सितकं ब्वंकेमा:गु खँय सुवाल ब: बियादीगु ख:।



राम प्रजापति
प्रोप्राइटर

हारी मिठाई भण्डार

(बुद्ध शाकाहारी)

कालिमाटी चौक, टंकेश्वर मार्ग, काठमाडौं ।
फोन नं. : ४२७२१९९, मो. ९८०३९८०६९९

यहाँ:- विवाह, व्रतबन्ध, पार्टी, पिकनिक, तथा अन्य शुभ कार्यको लागि अर्डर अनुसार मिठाईको व्यवस्था गरिन्छ ।



स्वास्थ्य विभाग
सर्वोपयोगी सेवा

आयो नून खाउँ स्वस्थ रहौ

पुनः स्वास्थ्यित भए
आयो नून खाउँ





गाउँसम्म आयो, 'आयो नून' यसले लगायो घेर गुन

आयोडिनको कमीबाट हुने विकृतिहरु:

१. गर्भ मृति, मुल शिशु मृत्यो, जन्म भए पछि शिशु नजिये, जन्मेको शिशु मर्दै सक्ने ।
२. बच्चाहरू बिराट, लडेउने, बाल्युदके, ढेढो आदि हुन सक्ने ।
३. पढाइमा कमजोर भई पढ्न पढ्न हुनको साथै खेलकुदमा समेत पछाडि परिसके ।
४. गलतीइ आउने, सुनमननियता हुने ।
५. आयोडिनको कमीले, I.Q Level कम हुने ।
६. आयोडिनको कमी भएमा महिलाहरूमा आलस्यमा आउने, काम गर्ने क्षमतामा कमी आउने ।
७. आयोडिनको कमीबाट गर्भमाथि हुने दुष्प्रभाव हुन सक्ने ।

आयोडिनको कमीबाट हुने विकृतिहरू उपचार गरेर हटाउन सकिने । त्यस्ता विकृति आउन नदिन एकमात्र उपाय आयो डेनित आयोडिननुक बालबालिकाको वित्त अर्किट पकेटको नून मात्र प्रयोग गर्नु ।

नेपाल सरकार

स्वास्थ्य विभाग

आयोडिनको कमीबाट हुने विकृतिहरू

आयोडिनको कमीबाट हुने विकृतिहरू

साइट ट्रेडिङ कर्पोरेशन लिमिटेड

केन्द्रीय कार्यालय: पो.ब.नं. ४८३, कालिमाटी, काठमाडौं, नेपाल, फोन नं. ४२०१४१५
४२०१४१६, ४२०१४०८, फ्याक्स नं. ४७०१-४२०१४०४, ४२०१४१५

ब्हूदं समारोह समिति यलया ग्वसालय ने.स



सं. ११३८ या भिंतुना सांस्कृतिक च्याली

बहना
LAHANA WEEKLY

किपा: राजु श्रेष्ठ



न्हूदं नेपाल सम्बत् ११३८ हनेगु इवल्य नेपाल सम्बत्या प्रवर्तक शंखधर साख्वा:या प्रतिमालिसें सांस्कृतिक जुलुस यल देय् चा:हिलेगु ज्या जुल । सांस्कृतिक जुलुस न्ह्याय् न्ह्यः प्रधानमन्त्री शेरबहादुर देउवां त्वा:देवा च्याका: सुभारम्भ सभाया उलेज्या यानादीगु खः । उगु ज्याइवल्य नेपालभाषा मंका: खल: यलया नाय: ऋषिप्रसाद श्रेष्ठ न्ववानादीगु खः:सा न्हूदं समारोह समितिया नाय: सुवर्णमान अमात्य लसकुस यानादीगु खः ।

थ्व लिपा प्रधानमन्त्री शेरबहादुर देउवां शंखधरया प्रतिमायात ध्वाना: विधिवतकथं सांस्कृतिक च्यालिया शुभारम्भ यानादीगु खः । उगु च्यालि मंगलबजा: नुग:त्वा:, तंग:, इखालखु, पूर्णचण्डी, गाबहा:, पिम्बाहा:, बालिफ:, धलाय्चा, क्वान्ति, क्वालखु जुया: हाकन मंग:बजा:या कोतय् थ्यंका: समापन जूगु खः ।

थ्वहे इवल्य सांस्कृतिक जुलुस क्वचाय्थुंका: मंगलबजारय् जूगु समापन जूगु खः । उगु समापन ज्याइवल्य शिक्षा मन्त्री गोपालमान श्रेष्ठ मूपाहाकथं भायादीगु खः:सा मन्त्री श्रेष्ठ उगु च्यालिइ ब्वतिइ का:गु थीथी त्वा:यात नगद सिरपा: ल:ल्हानादीगु खः । अथेहे ब्यानर ज्वनाव:गु थीथी पुच:यात नं समाजसेवी मोतिलाल शिल्पकारं नीस्वनादीगु 'मोतिलाल सिरपा:' ल:ल्हाय्गु ज्या जूगु खः । ज्याइव: स्यस्य: समाजया नाय: उत्तमलाल श्रेष्ठया सभाध्यक्षताय् जूगु खः ।

मेमेगु स्वयां फरक ढंगः यायगु सोच खः

खँल्हाबल्हा

रुपेन श्रेष्ठ 'थक्वा'मि, कलाकार

मुसुमुसु न्हिला म्यूजिक भिडियो तसकं लोकह्वाःगु खः। थौकन्हय् सकिपा ख्यलय् यक्व हे ब्यस्त जुयाच्चनादीम्ह कलाकार रुपेन श्रेष्ठ 'थक्वा'मि'पाखें थुगु म्यूजिक भिडियो पिथनादीगु खःसा थुकी वय्कलं हे म्ये च्वामि, हालामि, निर्देशककथं नं थःत न्हयब्वःगु दु। थुगु म्यूजिक भिडियो नकातिनि क्वचाःगु पेज श्री अवार्डय् बांलाःगु म्यूजिक भिडियोया अवार्ड त्याकेत ताःलाःगु खः। थ्वहे इवल्य वय्कलं मुसुमुसु न्हिलाया निगूगु ब्वकथं न्हूदें ११३८य् पिथनेगु ज्या जुगु दु। थुकियात कयाः कलाकार श्रेष्ठलिसे जुगु खँल्हाबल्हा न्हयब्वयाच्चना।

दकल्य न्हापां थुगु 'मुसुमुसु न्हिला' म्यूजिक भिडियो पिथने ज्या गुकथं जुल ?

नेपालभाषाया म्यूजिक भिडियो ख्यलय् मेमेगु स्वयां फरक ढंगं यायगु जिगु रहर खः। भतिचा ख्यालिन्हिल जाःगु, स्वइपिन्त नं न्हयइपूगु कथं जुइमाः धइगु जिगु सोच खः। थुकिया हे लिच्चः धायुमाः। थुकी जिं थःम्येस्यां म्ये च्वयागु खःसा लय् चिनेगु, परिकल्पना नापं निर्देशन नं यानागु जुल। अथेला जि न्हापानिसें अभिनय क्षेत्रय् दुगु हुनिं थुकी अभिनय नं यानागु जुल। थुकिया नितिं पासापिन्सं नं ग्वाहालि याःगु जुल। विशेषयानाः निर्देशनय् वय्कःपिन्सं ग्वाहालि याःगु खः।

थुकिया तातुना छु ले ?

जिं बर्षय् छगू म्यूजिक भिडियो पिकायगु धइगु त्याखं थुगु म्यूजिक भिडियो पिकायगु जुल। जिमि निम्ह म्हेयाय्या नामं चाय्कातयागु सिम्रिक सकिपा इण्टरटेन्टमेण्ट संस्था दुगु जुल। नाफा वइ मवइ धइगुपाखे खास हे ध्यान मबिया। नेपालभाषाया म्यूजिक भिडियो ख्यलय् छुं याय् माः धइगु त्याखं पिथनागु जुल। फक्व यायगु खः। गथे जुइ ?

थुगु म्यूजिक भिडियोया विशेषता छु दु, गुकियानाः स्वकुमि भाजु मयजुपिन्सं स्वय् हे माः धइगु ताइ ?

खास ला थ्व भिडियो मीगु हिसाबं दय्कागु मखु। छु निपु म्यूजिक भिडियो तयाः मीगु नं बांलाःगु खँ मखु। विशेषयानाः थुलि जक तयाः सत्याः निसः तका कायगु खँ नं जुइमखु। मेमेगु स्वयां फरक धइगु थुकी ख्यालिन्हिल जाःगु हे जुल। सायद नेपालभाषाया ख्यलय् मेमेगु स्वयां फरक जुगु हुनिं हे थुकियात सकस्यां यय्कूगु जुइमाः। आःतक स्वयगु खःसा भ्यूअर्सत छगू लख भिन्त्यद्वः स्वयां अप्वः थ्यनेधुंकल।

ब्यवसायिक कथं न्ह्याःवनेत छु यायमाली ?

कमिन्सं नं न्यापु खुपु म्यूजिक भिडियो तय् माल। बर्षय् छक्व पिथनेगु त्याखं अथेयानाः नं वनेफइ। तर थौकन्हय् डिभिडिया जमाना तना वनेधुंकल धाःसां ज्यू। ग्वीगू प्रतिशतं मन्याय्धुंकल। यूट्युबय् व हे वइनि धइगु मानसिकता दु। खय्तला यूट्युबपाखें नं धेवा

कमे याइ धाइ। तर भीथाय् थुकियात क्लिक यात धाःसा धेवा वःसा तसकं म्हे हे जुयाच्चंगु दु। विदेशय् थें मखु। व्यावसायिक जुयाः वने धाःसां नं वनेफगु अवस्था मदु।

थुकिया निगूगु ब्व कथं न्हूदेंया इलय् 'असिद्धि बिसिद्धि' पिहां वःगु मखुला ?

थ्व ला खः। तर थ्व निगूगु ब्व धकाः धाय् मछिं। बर्षय् छगू पिथनेगु तातुनां जक थुगुसी थ्व म्येचाः पिथनागु जुल।

कलाकारतय् म्वाकेगु नितिं छु यायमाली ?

थौकन्हय् सिद्धि, डिभिडि न्यायगु ला तसकं म्हे जुल धाःसा ज्यू। उकिं गुगु सञ्चार माध्यमय् म्ये थ्वइगु खः, गुगु टिभि च्यानलय् प्रसारण याइगु खः, उमिसं कलाकारतय् मस्याय्गु कथं रोयल्टी बी माल। अथेहे प्रचार प्रसारया भूमिका म्हेतेमाल। युट्युबय् भ्यूअर्सतय्सं यक्व शेयर यायमाल। यक्व भ्यूअर्सत दत धाःसा छुं भचा आय दइ, गुकियानाः मेगु म्येचाः पिकाय्त् ग्वाहालि जुइ।

मेगु नेवाःतय्सं याःगु ज्यायात नेवाःतय्सं हे सपोर्ट यायमाल। सकिपा ख्यलय् जक मखु, साहित्य, पत्रपत्रिका, थीथी ख्यलय् तिवः बीमाल। सकारात्मक कथं कुंखिनेगु ज्या जुइमाल, गुकियानाः गुणात्मक कथं न्हयःने वनेफइ। सुभाय्।

न्हयब्वःमहः : जुजुमान महर्जन

१ लाख

स्वयां अप्वसिनं स्वल
मुसुमुसु न्हिला



यै। नेवाः कलाकारिता ख्यलय् ताः ई न्हयवनिसें सकय जुयाः वया च्वनादीम्ह रुपेन श्रेष्ठ 'थक्वा'मि'यात आपासिनं छम्ह अभिनयकःमिया रुपय् म्हसीका वयाच्चंगु दुसा आः वय्कःया म्हसीका छम्ह संगीतकःमिया रुपय् नं न्हयःने वःगु दु। उलिजक मखसे वय्क या संगीतकःमिकथं

पिलुवःगु म्येया म्यूजिक भिडियोया युट्युबय् स्वकुमि ल्याः छगू लाखस्वयां अप्वः थ्यंगु दु। दच्छिया दुने छगू लाख व भिन्सद्वलं मल्याक्क स्वकुमिपिन्सं स्वय्धुंकूगु रुपेन श्रेष्ठ 'थक्वा'मि'या म्यूजिक भिडियोया म्येया बोल "मुसुमुसु न्हिला" खः। थ्व म्ये हालामि नं थः हे खःसा च्वामि नं थःहे खः। उलिजक मखसे

थ्व म्येया लय्चिनामि नं वय्कः हे खः। आपालं नेवाः सकिपाय् कलाकार जुयाः अभिनय याय् धुंकूम्ह रुपेन श्रेष्ठ 'थक्वा'मि' थुगुसी जुगु स्वक्वःगु पेजथ्री पिपुल्स च्वइस अवार्डय् थ्व हे म्येया नितिं दकल्य् बांलाःगु 'म्यूजिक भिडियो'या अवार्ड नं त्याकेत ताःलाःगु खः। अथेहेतुं थुगुसीया पेजथ्री

अवार्डय् रुपेन सकिपापाखे "तिन तिकः महाबिकः"या नितिं 'बेस्ट एक्टर'या अवार्ड नं त्याकूगु खः।

थुकथं बहुप्रतिभाया धनी कलाकारकथं न्हाय् धस्वाकेत ताःलाःमह रुपेनया "मुसुमुसु न्हिला" म्येय् कलाकार मयजु रजनी खइ गीं साथ बियाच्चंगु दुसा थुकी कबिन्द्र

तण्डुकार, लेखबहादुर मोक्तान, बलबहादुर माभीलिसेया कलाकारपिन्सं नं अभिनयस साथ बियातःगु दु। छम्ह चंखम्ह ल्यासें छम्ह सोभाचाम्ह ल्याय्म्यात हाय् का च्वनिगु लूयात कःधानातःगु थ्व म्ये ख्यालिन्हिलां जाःगु प्रस्तुतिया हुनिं तसकं हे लोक ह्वानाच्चंगु दुसा थुकी मुख्य यानाः रुपेन व रजनीया अभिनय प्रस्तुति तसकं हे धिसिलाः। थ्व म्यूजिक भिडियोया कोरियोग्राफी राजन शाही याःगु खःसा म्येया म्यूजिक एरेन्जर अञ्जन श्रेष्ठ खः। थ्व म्यूजिक भिडियोया क्यामेरापर्सन व भिजुअल एडिटर सोहन मानन्धर खः।

छगू सजोग हे धाय्मालि की थ्व म्यूजिक भिडियोस दुथ्यानाच्च्वीपं रुपेन, रजनी, सोहन, राजन थःथःगु विधाय् थुगुसीया पेजथ्री त्याकेत ताःलापिं खः। थुकथं रेकर्ड हे तय्त् ताःलागु थ्व म्ये "मुसुमुसु न्हिला" लिपा न्हूदें ने.सं. ११३८या लसताय् 'असिद्धि बिसिद्धि' डिभिडि पिथनादीगु दु।



छत्रपाटी निःशुल्क चिकित्सालय

(अस्पताल)

वार्षिक साधारण सभा सम्बन्धी सूचना

यस अस्पतालको वार्षिक साधारण सभा निम्न मिति, समय र स्थानमा हुने भएकोले सम्पूर्ण सदस्य महानुभावहरुलाई यसै सूचनालाई आधार मानी साधारण सभामा अनिवार्य उपस्थितिको लागि हार्दिक अनुरोध गर्दछौं।

मिति : २०७४/७/१८ गते शनिवार

समय : विहान ८ बजे

स्थान : क्लासिक बफेट प्वाइन्ट, खुसिबुँ

जलकृष्ण श्रेष्ठ

महासचिव

थप जानकारीको लागि : फोन नं. ४२१६१३८, ४२६६२२९, ४२५७९११



Sweet Cave

(जीवन दाईया पसः)

Kalimati, Kathmandu, Nepal

Tel: 4275511, 9741112777, 9851063000

यहाँ भोज तथा पार्टीहरूको लागि चाहिने स्पेशल दही, पनिर, लाखामरी, लालमोहन, बर्फी, रसबरी तथा अरु विभिन्न परिकारका मिठाईका लागि सम्पर्क राख्नुहोस्।

आउटडोर भेज क्याटरिङ पनि गरिन्छ।

मन्त्री केसीपाखें सतःया उलेज्या



यें । येंया वंघलय् कतिंपुन्हि व पाहांचःहेया इलय् यःसिं थनेत माःगु सिंया व्यवस्था जुया वयाच्वंगु किपू नगरपालिकाया चोभारय् च्वंगु छगू सतःया उलेज्या युवा तथा खेलकूद मन्त्री राजेन्द्रकुमार के.सीं उलेज्या यानादीगु खः । ज्याइवलय् दाता सनागूया महुमह गिरेन्द्रलाल सुवाल (कृष्ण)या म्ह्याय् सुनन्दा सिंह डंगोलया ग्वाहालिं निर्माण जुगु श्री आकाश भैरवया मूर्ति व शिलालेखया उलेज्या नं मन्त्री केसीं यानादीगु खःसा मंकाः निर्माण समिति व दातापिनिगु नां धलःया शिलालेख उलेज्या किपू नगरपालिकाया प्रमुख रमेश महर्जनं यानादीगु खः ।

श्री आकाश भैरवनाथ, वंघः व आदिनाथ सामुदायिक वन उपभोक्ता

समूह, चोभाः पाटी पौवा निर्माण समितिया मंकाः कुतलं दय्कूगु उगु सतःया उलेज्या ज्याइवलय् यें महानगरपालिकाया प्रमुख विद्यासुन्दर शाक्य व किपू नगरपालिकाया प्रमुख रमेश महर्जन विशेष पाहांकथं भायादीगु खः ।

सतः निर्माण समिति नापं श्री आकाश भैरवनाथ, वंघःया नायः शरद कुमार डंगोलया सभाध्यक्षताय् जूगु उगु ज्याइवलय् मोक्षबहादुर अमात्यया प्रधान सम्पादन व रत्नकाजी मनया सम्पादनय् पिदंगु विशेष स्मारिकाया नं सार्वजनिक याःगु खः ।

थुगु सतःया स्थापनापाखें बन्धुत्वया सन्देश व थुगु लागाया पर्यटकीय महत्व अप्वःया आन्तरिक व बिदेशी पर्यटकपिं आकर्षित जुइगु वक्तापिन्सं वः बियादीगु दु ।

नेवाः अमेरिकन दबूया ग्वसालय् न्हूदँ व म्हपुजा हन

यें । न्हूदँ नेपाल सम्बत् ११३८ व म्हपूजाया लसताय् नेवाः अमेरिकन दबू नं छगू तःजिगु ज्याइवः यासें अमेरिकाया सिकागोय् मंकाः म्हपूजा व न्हूदँ हनेगु ज्या जूगु दु । ज्याइवलय् ब्वति कयादीपिं सत्यां मल्याक मनूतय् दथुइ दकलय् ज्याथःम्ह भाजु श्याम ब्यञ्जनकारं त्वाःदेवा च्याकाः ज्याइवःया उलेज्या यानादीगु खःसा नेवाः अमेरिकन दबूया ख्वाःपौ “सिकागो नेवाः”या न्हय्पूगु ल्याःया विमोचन पेन्सिलभिया राज्यं भायादीपिं डा. मनोरञ्जन धौभडेल व सरिता धौभडेलं यानादीगु खः ।

उगु ज्याइवस सिकागोया नितिं कन्सुलर जनरल अफ नेपाःया भाजु मर्भिन ब्रसातिन व वय्कःया तिरिमय्जु भायाः म्हपूजा यानादीगु खः ।

नेवाः राष्ट्रिय म्ये, अमेरिकन व नेपाली राष्ट्रिय म्ये हाय्काः न्ह्याःगु उगु ज्याइवलय्



सत्यराम महर्जनं च्वयादीगु लसकुस म्ये, दबूया नायः उदय महर्जनपाखें लसकुस न्वचू अथेहे डा. धौभडेलपाखें नेपाल सम्वत् व नेवाः बारे न्ववानादीगु खः । ज्याइवःया निगूगु चरयणय् म्हपूजाया छसिकथं सिकागोया मय्जुपिन्सं भःभः धाय्क न्ह्याकूगु खः ।

थेच्चय् मन्दः च्वज्या धेंधेंबल्ला कासा जुल

यें । न्हूदँ ने.सं. ११३८ व स्वन्तिथा लसताय् गोदावरी नगरपालिकाब्यापी मन्दः च्वज्या धेंधेंबल्ला कासा जूगु दु । ग्वसाः खलः भनी भनी पुचःया नायः अनिल महर्जनया सभाध्यक्षताय् जूगु उगु ज्याइवलय् म्पाहां गोदावरी नगपालिकाया प्रमुख गजेन्द्र महर्जन धेंधेंबल्लाय् उत्कृष्ट जूगु पुचःयात सिरपाः व दसिपौ लःल्हाःगु खः । उगु कासाय् आर्ट क्लब न्हाप लाःगु खःसा अमरिल त्यातु इन ल्यू व बन्देसपुर महाविहार लियात्य् लाःगु खः । नेपालभाषा केन्द्रीय विभाग, यलया पुर्लांम्ह नायः सह-प्रा. तुलसीलाल सिंह विशेष पाहांकथं



भायादीगु खः ।

उगु कासाय् समुद्रमान सिं श्रेष्ठ, उजय बज्राचार्य व तारिकनन्द बज्राचार्य निर्णायक जुयादीगु खः । न्हूदँ नापं म्हपूजाया दिनस जूगु उगु कासाय् थेच्चया मुक्कं भिनिगू पुचलं ब्वति काःगु खः ।

नीदँ लिपा यलया सुन्दरीचोक सर्वसाधारणया नितिं चाय्कल

यें । यलया लायकूस्थित सुन्दरीचोक २०दँ लिपा सर्वसाधारणया नितिं चाय्कूगु दु । आइतवाः कछलाथ्व नवमी कुन्हु पाटन संग्रहालयया २०क्वःगु वार्षिकोत्सवया लसताय् नेपाल सरकार, संस्कृति पर्यटन तथा नागरिक उड्डयन मन्त्रालय अन्तर्गतया पाटन संग्रहालय विकास समितिया ग्वसाःलय् ‘जर्नल अफ पाटन म्यूजियम अंक १’या विमोचनलिसें सुन्दरी चोकया प्रदर्शनी कक्षया उलेज्या जूगु खः ।

२० दँया इतिहासय् निगूगु सफूकथं प्रकाशित ‘जर्नल अफ पाटन म्यूजियम अंक १’या लोकार्पण शताब्दी पुरुष सत्यमोहन जोशीं यानादीगु उगु ज्याइवलय् पुरातत्व विभागया महानिर्देशक भेष

नारायण दाहाल, संस्थापक निर्देशक संगीता थापा व सदस्य सचिव सुरेश लाखें थःगु नुगः खँ तयादीगु खः ।

ज्याभ्वः लिपा केभिपिटी नेपाःया निर्देशक रोहित रंजितकारं पाटन संग्रहालय विकास समितिया मू दूजः एवं नेपाल सरकार, संस्कृति पर्यटन तथा नागरिक उड्डयन मन्त्रालयया सचिव महेश्वर न्यौपाने, पुरातत्व विभागया महानिर्देशक भेष नारायण दाहाल, संस्थापक निर्देशक संगीता थापा, अमूर्त संस्कृति विज्ञ मोहन व्यञ्जनकारलिसें विशेष व्यक्तित्वपिनिगु उपस्थितिइ सुन्दरी चोकय् व्यवस्थित संग्रहालयया न्हापांखुसी अवलोकन याकादीगु दु ।

सन् १९९७ तत्कालिन जुजु वीरेन्द्र



शाहपाखें पाटन संग्रहालयया उलेज्या जूगु खःसा संग्रहालययात थुगुसी सुन्दरी चोकय् च्वंगु दरवारया ऐतिहासिक सम्पदाया सामग्री व्यवस्थित यानाः म्यूजियम क्षेत्रया बृद्धि याःगु खः ।

समावेशीताया सन्देशनापं ज्यापू म्यूजियम फियस्ता क्वचाल

यें । राष्ट्रपति विद्यादेवी भण्डारीजुपाखें दिप प्रज्वलन यानाः उलेज्या जूगु ज्यापू म्यूजियम फियस्ताया वंगु बिहिवाः संस्कृति, पर्यटन तथा नागरिक उड्डयन मन्त्री जितेन्द्र नारायण देवया मू पाहाँसूइ समावेशीताया सन्देशसहित क्वचाःगु दु ।

ज्याइवलय् विशेष पाहाँकथं भायादीम्ह जनकवि दुर्गालाल श्रेष्ठ यलया ज्यापु समाजं सांगठनिक विकासलिसें संस्कृति संरक्षणय् नेवाः तजिलजियात अभ्र समावेशी याना सकल नेवाःतय्गु व देयथा नितिं न्ह्यज्याय् फय्मा धयादिल । ज्याभ्वःया मूपाहां संस्कृति, पर्यटन तथा नागरिक उड्डयन मन्त्री जितेन्द्र नारायण देवं नेपाःया राजनैतिक ह्यूपाःया नितिं पहिचानसहित संघीयताया संघर्ष स्मरण यासें यलया आदिवासीपिनिगु भूमिकायात च्छायादिल ।

ज्यापू समाज यलया ग्वसालय् यल



लायकुलिं मन्त्री जितेन्द्र नारायण देव, जनकवि दुर्गालाल श्रेष्ठ, यल महानगरपालिकाया प्रमुख लगायत अधिकृतीपिं, जिल्ला प्रशासन अधिकृत, सुरक्षा निकाय प्रतिनिधि व ललितपुर उद्योग बाणिज्य संघया नवनिर्वाचित ज्यासना पुचःलिसें नेवाः ख्यलय् नांजाःपिं

व्यक्तित्वपिनिगु मुनेज्या लिपा फियस्ताया अवलोकन पदयात्रा नं जूगु खः । क्वय्लाछि च्यासलय् जूगु औपचारिक समापन ज्याइवः समाजया छ्याञ्जे मोहन व्यञ्जनकारजुं न्ह्याकादीगु खःसा सुभाय् समाजया नायः प्रेम महर्जनं बियादीगु खः ।

पञ्चदान यासें ‘ध्रुवतारा सम्मान’ लःल्हात

यें । शाक्य महाविहार संघया ग्वसालय् जूगु छगू ज्याइवःया दथुइ ‘ध्रुवतारा’ सम्मान लःल्हाःगु दु । श्रीमञ्जुश्रीनक महाविहा ओबहाःया थायपा आजु ९८दँदुम्ह दानरत्न शाक्ययात ज्याइवःया म्पाहां यें महानगरपालिकाया प्रमुख विद्यासुन्दर शाक्यं उगु सम्मानकथं हनापौ लःल्हानादीगु खःसा दाता ध्रुवरत्न शाक्यं भिद्वःतका दां लःल्हानादीगु खः ।

शाक्य विहार संघया नायः शुभकाजी शाक्यया सभाध्यक्षताय् जूगु उगु ज्याइवलय् येंया मुक्कं पीप्यंगू



बाहाःबहीया थायपाः आजुपिन्त बौद्ध परम्पराकथं पञ्चदान नं याःगु खः ।

संकिपा निर्माता नापं गंगा हलया थुवाःत मध्ये छम्ह ध्रुवरत्न शाक्य व वय्कःया जहान ताराशोभा शाक्यया नामं थुगु सम्मान येंया बौद्ध बाहाःबहीया थकालिम्ह आजुयात लःल्हाय्कथं थुगुसी नीस्वंगु खः ।

निर्वाचन...

जब मतपत्र ब्यागलं ब्यागलं जुइधुंकाः मतपत्र कुर्केगु बाकस नं ब्यागलं ब्यागलं जुइमाःगु अले सुरक्षाकर्मीत नं थप याय् मालीगु, मतदान याइगु थासय् हे तर्क पुनरावलोकन याय्मालीगु अवस्था वइगु जुयाः छुयाय्गु धकाः निर्वाचन आयोगपाखें ठोस निर्णय याय् फयाच्वंगु म्दुनि ।

कि त निर्वाचन जुइगु मतदान केन्द्रनिसें निर्वाचनया नितिं मतपत्र कुर्केगु बाकस व सुरक्षाकर्मीया सवालय् तर्क पुनःविचार याय्माल मखुसा याय् फइमखु धाय्मालीगु अवस्था ब्वलंगु दु । निर्वाचन आयोगं

सर्वोच्चया आदेशकथं प्रदेशसभा व प्रतिनिधिसभाया मतपत्र ब्यागलं ब्यागलं छापे याय्गु धकाः औपचारिककथं निर्णय याय्धुंक्कू जूसां नं मतदान केन्द्र, सुरक्षाकर्मी, मतदान याइगु बाकस नापं कर्मचारीया सवालय् तर्क पुनःविचार याय्माःगु जुयाः ठोस निर्णय याय् फयाच्वंगु म्दुनि । उकियात कयाः आः प्रधानन्त्री शेरबहादुर देउवालिसे नापं सरकारलिसे सहलह ब्याकाः जक निर्वाचन आयोगं निर्णय याइगु खँ सीदुगु दु । थुगु इलय् प्रधानमन्त्री नं चुनाव लिछ् याय्गु बिचाः तल धाःसा अवश्य नं चुनाव लिहांवनीगु अवस्था ब्वलंगु दु ।

आः वइगु...

थ्वहे कथं प्रतिनिधिसभाय् कस्तुरी श्रेष्ठ, डा. शम्भू चौधरी, पञ्चकुमारी मानन्धर, विनाखां सिं, नारद वज्राचार्यलिसें ११ म्हेसिगु उम्मेदवार पार्टीपाखें क्वःज्यूगु खः ।

अथेहे प्रदेशसभाय् मुक्कं २०म्ह समानुपातिकय् उम्मेदवारीकथं वरिष्ठ नेता सुवर्ण केशरी चित्रकार, मू छ्याञ्जे कृष्णहरि महर्जन, दांभरि उत्तमलाल जोशी, केन्द्रीय दुजः लक्ष्मीप्रकाश सैजु, ज्ञान बहादुर लामा, जमुना वराल वि.क., मोहम्मद नसीब मन्सुरी, विन्दा खातुन, कृष्ण बहादुर खत्री, अम्विका गुरुवाचार्य क्वःज्यूगु खः ।

आः अत्याधिक चर्चाय् वयाच्वंगु प्रत्यक्षया उम्मेदवारीया खेंय् नायः डा. विजयप्रकाश सैजु, कार्य समितिया दुजः विष्णु गोपाली, रामहरी रंजित, केन्द्रीय दुजः रीजु श्रेष्ठ, प्रमोद घिमिरेलिसें आःतक ९म्ह प्रत्यक्षय् प्रस्तावित जूगु दु । आः वइगु १४गतेया केन्द्रीय मुँज्यां मेपिं थप राजधानी यें लागाय् प्रत्यक्षया उम्मदेवारी थप यानाः उम्मेदवारीया धलःयात अन्तिम रुप बीगु खँ नायः डा. सैजुं जानकारी बियादिल । विशेष यानाः पहिचान पक्षधर त्याका छ्वय्माः धयाकथं पहिचान पक्षधर जनजाति पार्टीत नापं पार्टीगत तालमेलया खँ न्हयथनाच्वंगु दु । अथेहे नेपाः पार्टीं सघीय समाजवादी फोरमलिसे तालमेलया ज्या न्ह्यानाच्वंगु खँ सीदुगु दु ।



CLASSIC
GEM & JEWELRY PVT. LTD



*An exclusive collection handcrafted
Gold & Diamond Jewelry.*

Classic Gem & Jewelry (P) Ltd.

Natole - 20, Lalitpur, Nepal (Opp. of Madan Smarak School)
Tel: 01 - 5555891, 5539440, Email: info@classicjewelnp.com